

19 APR 1996  
Mahathir-Dragon  
MALAYSIA AKAN BANTU BANGUNKAN SEMULA BOSNIA

Oleh: MOKHTAR HUSSAIN

SARAJEVO, 19 April (Bernama) -- Malaysia hari ini berikrar akan membantu sedaya mungkin usaha pemulihan damai dan membangunkan semula Bosnia-Herzegovina.

Perdana Menteri Datuk Seri Dr Mahathir Mohamad berkata: "Dengan wujudnya semula damai hari ini dan pada saat negara ini memulakan tugas berat dan paling sukar untuk membangunkan semula negara, izinkan saya menegaskan sokongan dan kerjasama berterusan Malaysia terhadap Bosnia-Herzegovina. Kami akan bantu anda seberapa boleh".

Dr Mahathir berkata demikian pada istiadat pengurniaan bintang kebesaran "The Dragon of Bosnia" (Naga Bosnia), anugerah tertinggi negara ini yang dikurniakan kepadanya oleh kerajaan Bosnia-Herzegovina.

"Dengan perasaan rendah hati saya terima anugerah ini di samping memperingati roh lelaki dan wanita perkasa Bosnia yang mengorbankan nyawa mereka demi mempertahankan kedaulatan negara tercinta daripada kekejaman dan kezaliman serta penghapusan etnik atau pembunuhan beramai-ramai tidak berperikemanusiaan puak Serb. Tidak ketinggalan juga mereka yang memperjuangkan dan melaungkan keadilan apabila kuasa-kuasa besar hanya membisu tanpa sebarang tindakan," katanya.

Perdana Menteri juga menghargai jasa pasukan pendamai antarabangsa dan para petugas bantuan kemanusiaan yang bertungkus-lumus memberikan sumbangan bakti hingga kedamaian wujud semula di negara Balkan.

"Tambah pula beberapa rakan menawarkan diri dalam mempertahankan Bosnia di zaman penderitaannya. Hari ini anda diminta meninggalkan kawan-kawan itu oleh rakan-rakan baru yang komitmennya anda sendiri tidak pasti. Saya tidak iri hati terhadap kedudukan yang amat sukar itu," katanya.

Tambahnya, kesan-kesan luka perang empat tahun itu boleh dilihat dengan jelas di merata tempat di ibu negeri ini dan "tidak ada perkataan untuk menggambarkan betapa sedihnya saya melihat dan menyaksikan kemusnahan dan kerosakan akibat perbuatan durjana pihak musuh ke atas mereka yang tidak berdosa."

Dr Mahathir berkata: "Saya juga menerima penghormatan ini bagi pihak kerajaan dan rakyat Malaysia sebagai satu simbol khas persahabatan dan persaudaraan berkekal antara rakyat Malaysia dan Bosnia."

Anugerah itu dikurniakan kepada ketua-ketua kerajaan dan orang kenamaan sebagai menghargai jasa mereka ke arah membangun dan memperkukuhkan hubungan damai dan rapat antara Republik Bosnia dan Herzegovina dengan negara lain.

Antara pemimpin dunia yang telah menerima anugerah serupa ialah Perdana Menteri Pakistan Benazir Bhutto.

Terdahulu, Dr Mahathir menunaikan solat Jumaat bersama Presiden Alija Izetbegovic di Masjid Begova di sini. Selepas sembahyang, Dr Mahathir yang juga Menteri Dalam Negeri, mengambil kesempatan untuk beramah mesra dengan anggota Polis Awam Malaysia (CIVPOL) yang sedang berkhidmat di Bosnia-Herzegovina.

Dalam ucapannya, Izetbegovic berkata anugerah itu merupakan satu penghormatan bagi Dr Mahathir dan rakyat Malaysia yang banyak membantu rakyat Bosnia.

Beliau berkata Dr Mahathir merupakan contoh keberanian seorang negarawan dalam menyatakan kesusahan rakyat Bosnia di arena antarabangsa.

Presiden Bosnia itu juga berharap Malaysia akan terus menyokong Bosnia-Herzegovina.

Yang turut hadir pada istiadat itu ialah Datin Seri Dr Siti Hasmah Mohamad Ali dan para pemimpin Bosnia. -- BERNAMA

MOK ZAB NAK